



KOMUNIKADO DI PRENSA

Fecha:

17 sèptèmber 2018

Persona di kontakto:

Jhanirha Da Costa Gomez

E-mail:

jhanirha.anita@gobiernu.cw

Temporada di vürwèrk ta na kaminda

Pa 2018 por importá un máksimo di 18 kònteiner

Willemstad – Desèmber ta yega un djis i Gobièrnu di Kòrsou a kuminsá prepará debidamente pa e temporada di benta di vürwèrk. Nos komunidat ta disfrutá semper di shownan di vürwèrk i ta kumpra vürwèrk pa tira na kas. E tarea di Gobièrnu ta pa regulá uso di vürwèrk pa esaki sosodé na un manera ku ta seif pa tur hende. Den e kuadro aki, Gobièrnu a lanta un komishon multidisciplinario di eksplosivo i vürwèrk ku ta konsehá Gobièrnu riba diferente aspekto relashoná ku vürwèrk. E komishon aki ta konsistí di representantenan di e Organisashonnan di Maneho di Ministerio di Tráfiko, Transporte i Planifikashon Urbano (VVRP) i di Ministerio di Hustisia, Servisio pa Obra Públiko, Brantwer, Kuerpo Polisial, Servisio pa Medio Ambiente i Naturalesa, Direktorado pa Asuntunan Hurídiko, Direktorado pa Maneho di Riesgo, 'Havenmeester', i e Hefe di Inspekshon di Akseins. E aña aki e komishon aki a determiná e máksimo kantidat di kònteinernan ku por keda importá na un total di 18 kònteiner.

Tur aña importadónan di vürwèrk ta trese e merkansia aki for di afó pa tira show i bende. Na final di e temporada di benta, por sosodé ku ta sobra vürwèrk i ta warda esakinan den e mangasina ku Gobièrnu ta manehá na Brievengat. Na 2017 a sobra un total di 3 kònteiner yen i un kònteiner ku algun artíkulo den dje. E kantidat máksimo di kònteiner, ku e área asigná aki pa almasenahe di kònteiner por kontené, ta 21 kònteiner. Mirando e kapasidat máksimo aki, ta yega na e montante máksimo di 18 kònteiner di merkansia nobo ku importadónan por trese. 21 kònteiner ta loke ku e komishon a determiná komo seif pa tin riba e área aki teniendo kuenta ku si sosodé kualke insidente, esaki no ta sali for di man, i un eventual kandela ta keda kontené na algun kònteiner so.

Gobièrnu di Kòrsou lo vigilá e importashon, transporte, almasenahe, i benta di vürwèrk di aserka pa garantisá ku tur kos ta kana na un manera ordená i seif. Den transkurso di e lunanan ku ta sigui, Gobièrnu lo sigui komuniká e diferente aspektonan relashoná ku vürwèrk.